

Sumáriu Kazu

Tribunál Distritál Dili

Fevereiru 2019

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba violénsia hasoru fetu.

A. Sumáriu prosesu julgamentu kazu iha Tribunál Distritál Dili

1. Totál kazu ne'ebé JSMP monitoriza: 39

Artigu	Tipu Kazu	Númeru
Artigu 145 (KP) & Artigu 2, 3 no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	17
Artigu 154 (KP)	Maus tratus ba kónjuje	5
Artigu 155 (KP)	Maus tratus ba menór	1
Artigu 177 (KP)	Abuzu seksuál ba menór	1
Artigu 171 & 172 (KP)	Koasaun seksuál no violasaun seksuál	1
Artigu 172 (KP)	Violasaun seksuál	1
Artigu 172 & 173 (KP)	Violasaun seksuál ho agravasaun	1
Artigu 171 (KP)	Koasaun seksuál	1

Rua Beco Lakateu, Aldeia Manu fuik,
Suku Colmera, Administrativu Vera Cruz

Dili Timor Leste
PoBox: 275

Telefone: 3323883

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

Artigu 23 & 172 (KP)	Tentativa violasaun seksuál	1
Artigu 142 (KP)	Infantisídiu	1
Artigu 146 (KP)	Ofensa ba integridade fízika grave	1
Artigu 23 & 138 (KP)	Tentativa omisídiu simples	1
Artigu 139 (KP)	Omisídiu agravadu	1
Artigu 297 & 295 (KP)	Abuza poder no pekulatu	1
Artigu 295 (KP)	Pekulatu	1
Artigu 295 & 303 (KP)	Pekulatu no falsifikasaun ba dokumentu ka notasaun téknika	1
Artigu 267 & 297 (KP) & 295 (KP)	Burla agravada, abuza poder Pekulatu	1
Artigu 145 (KP)	Ofensa ba integridade fízika simples	1
Artigu 202 (KP) & Artigu 188 (KP) & Artigu 194 (KP) & Artigu 270 (KP)	Alterasaun ba Estadu tuir lei, asosiasaun kriminoza, Abuza sinál ka uniforme públiku no extorsaun	1
Totál		39

2. Totál desizaun ne'ebé JSMP monitoriza: 17

Tipu desizaun	Númeru
Suspensaun ba prizaun nia ezekusaun (Artigu 68 KP)	13
Suspensaun ba prizaun nia ezekusaun (Artigu 68 KP) ho regra ba konduta (Artigu 170 (g) KP)	2
Pena prizaun (Artigu 66)	2
Totál	17

3. Totál kazu ne'ebé sei kontinua prosesu tuir JSMP nia monitorizasaun: 22

A. Deskripsaun sumáriu ba desizaun kazu sira ne'ebé JSMP monitoriza:

1. Krime ofensa ba integridade fízika simples ho natureza violénsia doméstika

Nú. Prosesu : 0121/18.LILIQ

Kompozisaun Tribunál : Singulár

Juis : Dra. Edite Palmira
Prokuradór : Dr. Nelson de Carvalho
Defeza : Dr. Jonas Henrique
Tipu pena : Pena prizaun tinan 2 fulan 6 suspende ba tinan 3

Iha 01 Feveireiru 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu NdS hasoru nia feen, iha Distritu Likisá.

Akuzasaun Prokuradór

Prokuradór akuza katak iha 29 Setembru 2018, lezada fila tarde hosi seremonia koremetan família nian, nune'e arguidu tebe dala ida iha lezada nia kelen karuuk, foti ai-sanak baku dala haat iha lezada nia kotuk-laran kona mós lezada nia liman. Hafoin arguidu uza liman sikun fai dala ida ba iha lezada nia ibun no rezulta kanek no raan. Lezada ba halo tratamentu iha ospitál no iha relatóriu médiku kona-ba kanek sira ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu rekoñese faktu hotu iha akuzasaun no deklara katak arrende ninia hahalok. Arguidu mós deklara katak nia mak responsavel hodi sustenta nia família. Nune'e mós, lezada kontinua konfirma faktu sira iha akuzasaun no deklara katak momentu arguidu halo agresaun ne'e, lezada iha kondisaun isin-rua fulan rua.

Alegasaun final

Prokuradór konsidera arguidu provadu komete krime tuir faktu sira iha akuzasaun no husu ba tribunál atu konsidera faktu foun katak lezada isin rua fulan rua bainhira arguidu prátika aktu ne'e. Bazeia ba konsiderasaun hirak ne'e, husu ba tribunál atu kondena arguidu ho pena prizaun ho suspensaun ne'ebé adekuaudu atu asegura arguidu la repete tan ninia hahalok iha futuru.

Enkuantu defeza, husu ba tribunál atu kondena arguidu ho pena ne'ebé adekuadu ho konsiderasaun ba sirkunstánsia atenuante sira hanesan arguidu konfesa no arrepende ninia hahalok.

Desizaun

Depoisde avalia faktu sira hotu, tribunál prova duni katak arguidu tebe dala ida iha lezada nia kelen karuk, foti ai-sanak baku dala haat iha lezada nia kotuk-laran kona mós iha liman. Tribunál mós prova katak arguidu uza liman sikun fai dala ida iha lezada niaibun rezulta kanek no raan no iha relatóriu médiku ne'ebé haforsa aktu hirak ne'e.

Tribunál konsidera faktu foun katak lezada iha kondisaun isin rua bainhira arguidu prátika aktu hirak ne'e. Bazeia ba faktu provadu no konsiderasaun sira hotu, tribunál konklui no kondena arguidu ho pena prizaun tinan rua fulan neen no suspende ba tinan tolu.

2. Krime ofensa ba integridade fízika simples natureza violénsia doméstika

Nú. Prosesu	: 0063/17.ERHAT
Kompozisaun Tribunál	: Singulár
Juis	: Dra. Ana Paula Fonseca
Prokuradór	: Dr. Osorio de Deus
Defeza	: Dr. Fernando Lopes de Carvalho
Tipu pena	: Pena prizaun fulan 7 suspende ba tinan 1

Iha 05 Fevereiru 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MS hasoru nia feen, iha Distritu Ermera.

Akuzasaun Prokuradór

Prokuradór akuza katak iha 18 Marsu 2017, tuku 04.00 madrugada, arguidu no lezada sira-nia oan ki'ik hadeer no tanis maka'as. Lezada ne'ebé moras hela isin manas husu ba arguidu atu ko'us sira nia oan ne'e maibé arguidu lakohi ko'us. Lezada hirus no tolok arguidu dala barak nune'e arguidu hamrik no tuku dala rua iha lezada nia ulun. Aktu ne'e rezulta lezada sofre moras iha lezada nia ulun.

Prokuradór akuza arguidu hanesan autór material ho forma konsumada ba krime violénsia doméstika ho forma ofensa ba integridade fízika simples, ne'ebé previstu tuir artigu 2 (2a), 3(a), 35(b), no 36 LKVD no artigu 145 KP.

Produsaun ba prova sira

Iha julgamentu, arguidu konfesa integralmente ba faktu sira no deklara katak iha loron ida antes akontesimentu lezada ko'alia barak hasoru arguidu husi tuku 22.00 kalan to'o tuku 04.00 madrugada tanba lezada deskonfia arguidu iha relasaun ho nia tuananga sira. Arguidu deklara katak nia preokupa iha dadeer arguidu tenke ba servisu maibé lezada la fó tempu atu arguidu deskansa iha kalan, nune'e, arguidu komete krime ne'e hasoru lezada. Arguidu rekoñese katak asaun ne'ebé mak nia komete hasoru lezada ne'e ladiak maibé nia la tahan ho lezada ne'ebé ko'alia barak no arguidu sente hanesan lezada obriga atu arguidu tenke komete hahalok ne'e hasoru lezada.

Aleinde ne'e, lezada kontinua konfirma faktu sira husi akuzasaun prokuradór no deklara katak antes ne'e arguidu sempre halo komparasaun entre lezada ho arguidu nia tuananga sira katak tuananga sira mutin no bonita liu lezada. Lia fuan sira ne'e mak halo lezada laran moras no halo lezada ko'alia barak no tolok arguidu iha kalan ne'ebá.

Alegasaun finál

Prokuradór argumenta katak arguidu hetan akuzasaun tanba arguidu la kontrola emosaun no halo asaun hasoru lezada. Aleinde ne'e, arguidu sempre kompara lezada ho arguidu nia tuananga sira mezmú arguidu deside kaben ona ho lezada. Tanba ne'e atu halo prevensaun iha futuro, husu ba tribunál atu aplika pena prizaun fulan neen suspende ba tinan ida.

Defeza husu ba tribunál atu fó justisa ne'ebé justu ba arguidu tanba arguidu konfesa faktu sira iha krime ne'ebé nia komete no arrepende nia hahalok.

Desizaun

Depoide avalia faktu sira ne'ebé prodús iha prosesu julgamentu, tribunál prova katak arguidu komete duni krime hasoru lezada tuir akuzasaun prokuradór nian.

Bazeia ba faktu provadu sira ne'e, tribunál konklui no kondena arguidu ho pena prizaun fulan hitu suspende ba tinan ida.

3. Krime ofensa ba integridade fízika simples natureza violénsia doméstika

Nú. Prosesu : 0026/16.ALSIC
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Bartolomeu de Araújo
Defeza : Dr. Fernando Lopes de Carvalho
Tipu pena : Pena prizaun fulan 11 suspende ba tinan 1 fulan 6 ho
regra ba konduta

Iha 06 Fevereiru 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AC hasoru nia feen, iha Distritu Aileu.

Akuzasaun Prokuradór

Prokuradór akuza katak iha 09 Outubru 2016, tuku 17:00 lokraik, lezada foti osan \$0.25 hodi sosa tiha sukaer iha kios. Arguidu ejize no husu atu lezada fó-fila osan refere ba arguidu hodi sosa sigaru. Maibé lezada la fó fila osan ne'e. Arguidu hirus no taka tiha odamatan ba lezada iha liur no iha tempu ne'ebá udan boot. Lezada tenta tama ba uma-laran maibé odamatan save. Lezada bolu nia banin fetu husu ajuda loke odamatan no banin fetu loke odataman ba lezada. Bainhira arguidu haree lezada tama ba uma-laran, arguidu tolok lezada no husu sé mak loke odamatan ba lezada. Arguidu hakbesik-an ba lezada, riba lezada ba rai no basa dala rua iha lezada nia hasan-karuk. Konsekuénsia husi arguidu ninia hahalok ne'e halo lezada sofre moras iha lezada ninia hasan.

Prokuradór akuza arguidu hanesan autór material ho forma konsumada ba krime violénsia doméstika ho forma ofensa ba integridade fízika simples, ne'ebé previstu tuir artigu 2 (2a), 3(a), 35 (b) no 36 LKVD no artigu 145 KP.

Produsaun ba prova sira

Iha julgamentu, arguidu konfesa faktu sira hotu no deklara katak desde arguidu no lezada moris hamutuk arguidu foin primeiravés komete krime hasoru lezada. Arguidu arrepende ninia hahalok tanba konsiente katak ninia hahalok ne'e ladiak no promete ba tribunál katak sei la komete tan hahalok refere hasoru lezada no ema seluk iha futuru.

Prokuradór presinde atu la rona ona lezada nia deklarasaun tanba arguidu konfesa faktu sira hotu, arrepende ninia hahalok, arguidu rasik konsiente katak asaun ne'ebé nia komete hasoru lezada ne'e ladiak no promete sei la repete iha futuru.

Alegasaun final

Arguidu komete krime hasoru lezada tanba osan US\$0.25 atu sosa sigaru. Maibé iha julgamentu arguidu konfesa faktu hotu no promete la halo tan hahalok refere hasoru lezada no ema seluk. Tanba ne'e, husu ba tribunál atu aplika pena prizaun fulan neen suspende ba tinan ida inklui husu ba tribunál tenke fó hanoin ba arguidu atu la repete ninia hahalok hanesan iha futuru.

Enkuantu defeza husu ba tribunál atu aplika pena admoestasaun tanba arguidu foin primeiravés komete aktu violénsia hasoru lezada no arrepende ninia hahalok ne'e.

Desizaun

Depois avalia faktu sira hotu, tribunál konsidera arguidu provadu komete krime hasoru lezada tuir faktu sira iha akuzasaun prokuradór. Bazeia ba prova sira ne'e, tribunál kondena arguidu ho pena prizaun fulan 11 suspende ba tinan 1 fulan 6 ho regra ba konduta atu arguidu apresenta-an periodikamente kada fulan dala ida durante fulan 11 iha tribunál.

4. Krime ofensa ba integridade física simples ho natureza violénsia doméstika

Nú. Prosesu	: 0039/18.LIBST
Kompozisaun Tribunál	: Singulár
Juis	: Dr. António Helder Viana do Carmo
Prokuradór	: Dr. Nelson de Carvalho
Defeza	: Dr. Jose da Silva
Tipu pena	: Pena prizaun fulan 3 suspende ba tinan 1

Iha 06 Feveireiru 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AF hasoru nia feen, iha Distritu Likisá.

Akuzasaun Prokuradór

Prokuradór akuza katak iha 23 Abril 2018, tuku 14:00 lokraik, lezada diskute malu ho ninia banin feto kona-ba batar ne'ebé mak lezada behu hela atu tau ba iha jerigen litru lima laran. Arguidu haruka lezada atu nonook maibé lezada kontinua nafatin deskute malu ho ninia banin feto. Arguidu lori katana ninia belar baku dala ida iha lezada nia ulun maibé la kona tanba lezada sata-netik ho nia liman rezulta liman fuan sorin karuk kanek. Tanba tauk, lezada halai ba iha estrada maibé arguidu halai tuir lori katana nia belar baku tan dala ida iha lezada ninia kotuk-laran. Arguidu kontinua tuku dala ida iha lezada ninia hirus-matan no rasta lezada tama ba sira nia uma laran. Aktu hirak ne'e rezulta lezada halo tratamentu iha Sentru Saúde Bazartete.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara katak problema ne'e sira rezolve ona tuir kustume Timor nian. Arguidu entrega osan US\$50.00 ba família lezada nian no lipa ida entrega ba lezada. Arguidu deklara mós katak arrepende ninia hahalok, foin primeiravés mai hatan iha tribunál, diak malu ona no lezada no to'o agora la baku ona lezada.

Nune'e mós lezada kontinua reforsa no konfirma tomak faktu sira iha akuzasaun inklui konfirma ho arguidu nia deklarasaun katak kazu ne'e sira rezolve ona no arguidu entrega osan US\$ 50.00 ba lezada nia família, lipa ida ba lezada no arguidu la baku tan ona lezada.

Alegasaun finál

Prokuradór haktuir katak arguidu konfesa ninia hahalok no konfirma mós ho lezada. Kazu ne'e rezolve ona tuir kustume Timor no arguidu fó ona osan US\$50.00 no tais ida ba parte lezada. Tanba ne'e atu halo prevensaun ba krime violénsia doméstika iha futuru, husu ba tribunál atu kondena arguidu ho pena prizaun maibé suspende ninia ezekusaun.

Enkuantu defeza husu ba tribunál atu aplika pena ne'ebé adekuaadu ba arguidu tanba konsidera sirkunstánsia atenuante sira hanesan arguidu konfesa, arrepende ninia hahalok, diak malu ona ho lezada no rezolve ona problema ne'e tuir kustume Timor.

Desizaun

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu konfesa faktu sira ne'ebé akuza ba nia, arrepende ninia hahalok, diak malu ona ho lezada no foin primeiravés hatan iha tribunál, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

5. Krime ofensa ba integridade fízika simples natureza violénsia doméstika

Nú. Prosesu	: 0032/18.ALSIC
Kompozisaun Tribunál	: Singulár
Juis	: Dra. Maria Solana
Prokuradór	: Dr. Bartolomeu de Araújo
Defeza	: Dr. Jose da Silva
Tipu pena	: Pena prizaun tinan 1 suspende ba tinan 1

Iha 07 Fevereiru 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida AdS hasoru nia laen, iha Distritu Aileu.

Akuzasaun Prokuradór

Prokuradór akuza katak iha 07 Agostu 2018, tuku 16:00 lokraik, lezadu fila husi hamoos Kapela Santu António ho sarani sira seluk. Bainhira sunu hela siragu iha dapur, derepende arguida lori katana taa dala ida iha lezadu nia koskoleta parte

loos rezulta kanek boot no ran sai maka'as. Arguida kontinua taa tan iha lezadu nia kabas leten maibé lezadu satan netik ho nia liman loos, nune'e rezulta lezadu nia liman laran kanek boot no ran sai maka'as.

Lezadu husu ba arguida tanbasá arguida taa nia, arguida hatan katak "taa mate deit". Depoizde liu tiha maizumenus oras rua, ambulánsia to'o no lori kedas lezadu ba halo tratamentu iha Ospitál Aileu no baixa kalan ida. Lezadu hetan suku pontu 12 iha liman laran no suku pontu tolu iha liman fuan inan. Entretantu iha parte koskoleta infermeiru sira fase no kose deit aimoruk. Maske hetan tratamentu saúde maibé kazu ne'e la konsege prodús relatóriu médiku. Arguida no lezada moris hamutuk durante tinan haat ona no sira laiha problema. Arguida nia hahalok rezulta lezadu sofre moras iha koskoleta no liman.

Prokurador akuza arguida hanesan autór material ho forma konsumada, ba krime violénsia doméstika, tuir art. 2 no. 1 e 2, art. 3 art. 35 no. 36, alinea b, no art. 145 KP.

Produsaun ba prova sira

Iha julgamentu, arguida konfesa faktu sira hotu iha akuzasaun no deklarara katak depois buat hotu akontese mak arguida foin konsiente katak nia taa ona lezadu. Arguida mós deklarara katak entre nia no lezadu nunka iha problema tanba ne'e arguida arrepende ninia hahalok ne'e no promete sei la komete tan iha futuru.

Enkuantu lezadu kontinua konfirma faktu sira iha akuzasaun no deklarara katak to'o agora arguida la ko'alia sai razaun tanbasá taa lezadu.

Alegasaun finál

Iha julgamentu, arguida konfesa faktu sira hotu no deklarara katak iha momentu ne'ebá arguida laiha intensaun hodi taa lezadu. Arguida mós la sofre moras mental, ho nune'e prokuradór husu pena prizaun tinan ida suspende ba tinan ida fulan ne'en hodi bele eduka arguida atu halo tan krime hanesan iha futuru.

Enkuantu defeza husu ba tribunál atu aplika pena ne'ebé justu ba arguida tanba arguida foin primeiravés mai hatan iha tribunál, kolabora diak ho tribunál no konfesa faktu sira hotu.

Desizaun

Depoisde avalia faktu sira ne'ebé prodús iha julgamentu laran, tribunál prova katak arguida komete duni krime tuir faktu sira iha akuzasaun. Bazeia ba faktu provadu ne'e, tribunál konklui no kondena arguida ho pena prizaun tinan ida suspende ba tinan ida.

6. Krime maus tratus ba kónjuje

Nú. Prosesu : 0040/17.LILIQ
Kompozisaun Tribunál : Koletivu
Juis : Dra. Ana Paula Fonseca, Dra. Julmira M. Auxiliadora
no Dr. Eusébio Victor
Prokuradór : Dr. Nelson de Carvalho
Defeza : Dr. Manuel Sarmiento
Tipu pena : Pena prizaun tinan 3 suspende ba tinan 3 fulan 6

Iha 08 Feveireiru 2019, Tribunál Distritál Dili hala'ó julgamentu leitura akordaun ba krime maus tratus ba kónjuje ne'ebé envolve arguidu LdJ hasoru nia feen, iha Distritu Likisá.

Akuzasaun Prokuradór

Prokuradór akuza katak iha 28 Janeiru 2017, arguidu ho lezada fila hosi merkadu no bainhira tuun hosi mikrolet arguidu no lezada deskute malu. Arguidu tebe dala haat iha lezada nia kotuk-laran halo lezada monu ba rai no bainhira lezada hamrik, arguidu tuku tan dala hat iha lezada nia kaba'as no tebe dala rua iha kanotak.

Iha 23 Abril 2017, arguidu haruka lezada ba faan modo iha merkadu no lezada fila kalan. Arguidu ho lampra ba hein ona lezada iha dalan klaran no bainhira lezada to'o besik arguidu, arguidu uza lampra tuku dala tolu iha lezada nia ulun-fatuk. To'o iha uma, arguidu basa dala rua iha lezada nia hasan-karuk, tuku dala rua iha kaba'as parte loos no tebe dala rua iha iha kidan.

Iha Maiu 2017, arguidu deskute malu ho lezada tanba deskonfia lezada ho mane seluk. Arguidu rasta lezada nia fuuk no dada sai lezada hosi uma laran ba li'ur maibé lezada ka'er metin airin uma nian rezulta ain tuur kanek tanba roos ba rai.

Arguidu foti kadeira masa ida baku dala ida iha lezada nia kotuk-laran no basa dala ida iha hasan parte loos.

Prokuradór akuza arguidu kontra artigu 154 KP kona-ba maus tratus ba kónjuje ho moldura penál tinan 2 to'o 6 no konjuga ho artigu 2, 3(a), 35(a) no 36 LKVD.

Produsaun ba prova sira

Iha julgamentu, arguidu hili direitu nonook. Entretantu, lezada konfirma hotu faktu sira iha akuzasaun no deklara katak depoisde akontesimentu ikus ne'e, lezada halai ba hela tiha iha nia família durante fulan ida no arguidu nunca ba tuir hodi husu deskulpa. Maibé tanba lezada sei hadomi arguidu no lakohi atu oan sira lakon sira nia aman, nune'e maske lezada sente tauk maibé lezada rasik deside fila ho sira nia oan ba hela ho arguidu.

Alegasaun finál

Prokuradór konsidera arguidu hatudu hahalok ne'ebé la konsidera tebes lezada hanesan nia feen. Aleinde ne'e, prokuradór argumenta katak lezada sei iha presauñ psikolójia tanba arguidu la hatudu arependimentu, la ba husu deskulpa no la ba bolu lezada fila ba uma. Situasaun ida-ne'e hatudu katak iha tendénsia maka'as arguidu sei repete ninia hahalok iha futuru. Bazeia ba konsiderasaun hirak ne'e, husu ba tribunál atu kondena arguidu ho pena prizaun tinan rua suspende ba tinan tolu.

Enkuantu parte defeza argumenta katak arguidu komete krime hasoru lezada tanba diskonfia lezada ho mane seluk tanba ne'e, husu ba tribunál atu fó pena suspensa.

Desizaun

Tribunál hafoin tetu ba faktu sira hotu konklui katak arguidu provadu tebe dala haat iha lezada nia kotuk laran to'o lezada monu ba rai. Bainhira lezada hamrik hosi nia monu ne'e, arguidu kontinua tuku dala haat iha lezada nia kaba'as no tebe dala rua iha kanotak.

Tribunál prova katak arguidu uza lampra tuku dala tolu iha lezada nia ulun fatuk. Hafoin bainhira to'o iha uma, arguidu basa dala rua ba lezada nia hasan parte karuuk, tuku dala rua iha kaba'as parte loos no tebe dala rua iha kidan. Tribunál

prova mós katak arguidu rasta lezada nia fuuk no dada sai hosi uma laran mai li'ur, maibé tanba lezada ka'er metin ba airin uma nian rezulta lezada nia ain tuur kanek tanba roos ba rai. Hafoin arguidu foti kadeira masa baku dala ida iha lezada nia kotuk-laran no basa tan dala ida iha lezada nia hasan parte loos.

Arguidu nia hahalok ne'e halo lezada sofre moras iha ne'ebé hetan agresaun no tuir loos arguidu nu'udar la'en tenke proteze lezada. Tribunál konklui prosesu ne'e hodi kondena arguidu ho pena prizaun tinan 3 suspende ba tinan 3 fulan 6.

7. Krime ofensa ba integridade fízika simples natureza violénsia doméstika

Nú. Prosesu : 0067/18.ERREM
Kompozisaun Tribunál : Singulár
Juis : Dr. Jose Maria de Araújo
Prokuradór : Dr. Bartolomeu de Araújo
Defeza : Dr. Estaguia Guterres
Tipu pena : Pena prizaun tinan 1 suspende ba tinan 3

Iha 08 Feveireiru 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JBM hasoru nia feen, iha Distritu Ermera.

Akuzasaun Prokuradór

Prokuradór akuza katak iha 02 Feveireiru 2018, lezada hadeer halo matabisu no lezada fó hatene ba arguidu kona-ba lia rekadu husi lezada nia uma atu halo rate. Maibé arguidu hatan ba lezada katak "*ita lori tuir ita nia kbiit*". Lezada hatan fila fali ba arguidu katak "entaun loos ona ita-boot mak lori belak no ha'u lori bibi ida". Depoizde hatan ba malu hanesan ne'e, lezada la'o sai ba veranda no rona arguidu ko'alia ba nia alin (ST) akompana ho liafuan tolok no dehan nia alin katak se lia ne'e mak loos duni arguidu sei soe tiha lezada. Depoizde ida-ne'e, lezada ba tiha iha xefe aldeia nia uma no bainhira fila hosi ne'ebá lezada husu ba ST katak "*ohin imi na'in rua - ó ho ó-nia maun ko'alia saida?*". Maibé ST la hatan no lezada tama kedas ba kuartu-laran. Hafoin arguidu tama tuir lezada ba iha kuartu-laran no tolok no tuku dala rua iha lezada nia ulun halo lezada monu ba kama laran. Arguidu mós

sempre du'un lezada ba mane seluk. Arguidu komete violénsia fízika hasoru lezada dala rua ona no agora dadaun arguidu no lezada hela separadu ona.

Prokuradór akuza arguidu hanesan autór material ho forma konsumada ba krime violénsia doméstika ho forma ofensa ba integridade fízika simples ne'ebé previstu artigu 2 (2a), 3(a), 35 (b) no 36 LKVD no artigu 145 KP.

Produsaun ba prova sira

Iha julgamentu, arguidu rekoñese katak nia komete duni krime hasoru lezada maibé la'os tuku maibé basa dala rua iha duni lezada nia ulun. Arguidu deklara katak nia alin ST mak informa ba nia katak lezada mete ho mane seluk iha nia servisu fatin. Arguidu mós hatutan katak informasaun ida ne'e kuaze ema hotu iha Ponilala hatene no halo arguidu laiha kedas dignidade.

Entretantu lezada kontinua konfirma faktu sira iha akuzasaun no lamenta ho arguidu no nia família ne'ebé depoisde problema ne'e akontese lori tiha sira nia oan nain haat mai hela tiha iha Dili no bandu lezada vizita sira nia oan.

Alegasaun finál

Iha julgamentu, arguidu konfesa faktu hotu, so iha diferente deit mak kona-ba faktu tuku no basa, maibé krime ne'e akontese duni. Arguidu komete krime hasoru lezada tanba deit lia falsu ne'ebé mak tuir loloos arguidu tenke konfirma uluk ba lezada ne'ebé hanesan nia feen. Maibé arguidu fiar liu ba nia alin no família sira nune'e ikus mai arguidu komete hahalok ne'ebé lei bandu. Prokuradór mós sita katak arguidu antes ne'e baku lezada dala rua maibé lezada la hato'o keixa, tanba ne'e husu ba tribunál atu aplika pena minimun husi krime ida ne'e no suspende tuir pena minimu.

Enkuantu defeza husu ba tribunál atu aplika pena multa ba arguidu tanba arguidu iha responsabilidade ba sira nia oan nain haat ne'ebé mak da-daun ne'e hela hamutuk ho arguidu. Aleinde ne'e, arguidu mós konfesa no arrepende ninia hahalok maske arguidu rasik deklara ba tribunál katak sei la fila ba moris hamutuk ho lezada tanba arguidu moe ona.

Desizaun

Depois avalia faktu sira ne'ebé prodús durante julgamentu, tribunál prova katak arguidu komete duni krime hasoru lezada. Bazeia ba prova ne'e, tribunál konklui no kondena arguidu ho pena prizaun tinan ida suspende ba tinan tolu no kondena arguidu selu kustu judisiál US\$50.00.

8. Krime ofensa ba integridade fízika simples ho natureza violénsia doméstika

Nú. Prosesu : 0101/17.LIBZT
Kompozisaun Tribunál : Singulár
Juis : Dra. Ana Paula Fonseca
Prokuradór : Dr. Reinato Bere Nahak
Defeza : Dr. Manuel Sarmiento
Tipu pena : Pena prizaun tinan 1 fulan 6 no suspende ba tinan 2

Iha 08 Feveireiru 2019, Tribunál Distritál Dili hala'ó julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdA hasoru nia feen, iha Distritu Likisá.

Akuzasaun Prokuradór

Prokuradór akuza katak iha loron ne'ebé la apuradu maibé iha 2017, arguidu ho lezada ba iha seremonia kazamentu família nian. To'ó iha ne'ebá, arguidu tuur ho nia kolega sira no hemu tua barak to'o lanu. Hafoin lezada hakbesik-an ba arguidu no husu atu arguidu para ona hemu tua tanba sira sei fila ba uma ho motor. Maibé arguidu la preokupa no kontinua hemu tua. Lezada hirus no la'o fila ba uma. Arguidu ho motor duni tuir lezada no toman lezada iha dalan klaran, arguidu tuun hosi motor no tebe dala ida iha lezada nia kanotak parte karuk, tuku dala ida iha kaba'as parte loos no tuku dala ida tan iha lezada nia kotuk-laran no halo lezada monu ba rai. Bainhira lezada hadeer, arguidu uza nia liman sikun fai dala ida ba lezada nia hirus-matan halo lezada monu tan ba rai no lakon kedan konsiénsia. Tanba agresau hirak ne'e kauza lezada tenke ba halo tratamentu iha ospital.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa ba faktu hotu no deklarata katak momentu ne'ebá nia lanu todan. Arguidu deklarata katak nia arrepende no hafoin liu tiha semana ida arguidu ba bolu fali lezada iha lezada nia inan-aman no di'ak malu to'o agora.

Aleinde ne'e, lezada kontinua konfirma faktu sira iha akuzasaun no konfirma mós ho arguidu nia deklarasaun katak to'o agora arguidu la baku ona lezada.

Alegasaun final

Prokuradór konsidera arguidu provadu komete krime tuir faktu sira no konsidera krime ho natureza violénsia doméstika tinan-tinan kontinua aumenta, ho nune'e husu ba tribunál kondena arguidu ho pena prizaun tinan ida suspende ba tinan ida fulan neen.

Enkuantu defeza, husu ba tribunál atu kondena arguidu ho pena admoestasaun ho konsiderasaun ba sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no nunca baku ona lezada.

Desizaun

Tribunál konklui katak arguidu provadu tebe dala ida iha lezada nia kanotak parte karuk, tuku dala ida iha kaba'as parte loos no tuku tan dala ida iha lezada nia kotuk-laran halo lezada monu ba rai. Tribunál mós prova katak bainhira lezada hadeer arguidu uza liman sikun fai dala ida ba lezada nia hirus-matan halo lezada monu tan ba rai no lakon kedan konsiénsia. Lezada hetan tratamentu iha ospítal. Bazeia ba prova hirak ne'e, tribunál konklui prosesu ne'e no kondena arguidu ho pena prizaun tinan ida fulan neen suspende ba tinan rua.

9. Krime maus tratus ba kónjuje

Nú. Prosesu : 0235/17.DINFT

Kompozisaun Tribunál : Koletivu

Juis : Dr. Eusébio Victor, Dra. Ana Paula Fonseca no Dra.
Julmira M. Auxiliadora

Prokuradór : Dr. Nelson de Carvalho

Defeza : Dr. Manuel Sarmiento
Tipu pena : Pena prizaun tinan 2 suspende ba tinan 3

Iha 11 Feveireiru 2019, Tribunál Distritál Dili hala'o julgamentu leitura akordaun ba krime maus tratus ba kónjuje ne'ebé envolve arguidu JdC Lobo hasoru nia feen, iha Distritu Dili.

Akuzasaun Prokuradór

Prokuradór akuza katak arguidu no lezada moris hamutuk desde 2005 no iha oan na'in lima. Desde moris hamutuk ne'e arguidu sempre baku lezada. Iha 15 Maiu 2017, arguidu foti gaveta armáriu nian no baku dala barak iha lezada nia kotuk-laran, tuku dala rua iha kanuruk no rasta lezada ba rai. Hafoin arguidu basa dala rua iha lezada nia hasan-loos. Momentu ne'ebá lezada iha kondisaun grávida.

Iha Juñu 2017, bainhira lezada foin partu bebe fulan ida, arguidu foti vintuña baku dala ida iha lezada nia ulun, tuku dala haat iha lezada nia ulun no dudu monu lezada ba kama-laran hodi kontinua tuku dala barak iha lezada nia ulun. Arguidu sempre hemu tua antes baku lezada. Arguidu nu'udar funsionáriu iha Komisaun Nasional ba Elisaun ho vensimentu US\$500 kada fulan.

Prokuradór akuza arguidu kontra artigu 154 KP kona-ba maus tratus ba kónjuje ho moldura penál tinan 2 to'o 6, konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu no deklara katak arrepende ninia hahalok no nunca baku ona lezada. Aleinde ne'e, lezada konfirma hotu faktu sira no deklara katak agora di'ak malu ona ho arguidu no arguidu nunca baku ona lezada.

Alegasaun final

Prokuradór konsidera arguidu provadu komete krime hasoru lezada no no husu ba tribunál kondena arguidu ho pena adekuadu.

Enkuantu parte defeza husu ba tribunál atu kondena arguidu ho pena kmaan ho konsiderasaun ba sirkunstánsia atenuante sira arguidu konfesa totalmente,

arrepende ninia hahalok no di'ak malu ona ho lezada. Arguidu mós prátika hahalok ne'e ho kondisaun lanu no to'o agora la repete hikas ninia hahalok.

Desizaun

Depoisde avalia faktu hotu, tribunál prova katak arguidu sempre baku lezada desde sira moris hamutuk iha 2005. Iha 15 Maiu 2017, arguidu baku lezada ho gaveta armáriu nian dala barak ba lezada nia kotuk-laran, tuku dala rua iha kanuruk no rasta lezada ba rai hafoin basa dala rua iha hasan-loos. Tribunál prova katak momentu ne'ebá lezada gravida hela.

Tribunál prova katak iha Juñu 2017, arguidu baku lezada nia ulun dala ida ho ventuiña bainhira lezada foin partu bebe fulan ida, tuku dala haat iha lezada nia ulun no dudu monu lezada ba kama-laran no tuku dala barak ba lezada nia ulun.

Tribunál mós prova katak arguidu sempre hemu tua to'o lanu antes baku lezada. Bazeia ba prova hirak ne'e, tribunál konklui prosesu ne'e no kondena arguidu ho pena prizaun tinan rua suspende ba tinan tolu.

10. Krime ofensa ba integridade fízika simples natureza violénsia doméstika

Nú. Prosesu	: 0010/19.ALSIC
Kompozisaun Tribunál	: Singulár
Juis	: Dra. Maria Solana
Prokuradór	: Dra. Ivonia Guterres
Defeza	: Dr. Nelson Borges (defensór estajiáriu)
Tipu pena	: Pena prizaun tinan 1

Iha 12 Fevereiru 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu PE hasoru nia feen, iha Distritu Aileu.

Akuzasaun Prokuradór

Prokuradór akuza katak iha 04 Fevereiru tinan 2018, oras 02:00 madrugada, lezada hamutuk ho nia banin iha hela dapur laran no rona arguidu hakilar iha liur. Lezada preokupa no la'o sai ba hapara arguidu no arguidu mós la hakilar tan.

Liu tiha ne'e, arguidu ba tiha iha merkadu no fila tuku 14:00 meudia no kontinua hakilar iha estrada. Lezada koko ba hapara arguidu maibé arguidu tebe lezada nia hirus-matan halo lezada monu ba rai. Tanba tauk lezada hamrik no halai ba fó hatene iha polísia. Konsekuénsia husi arguidu nia hahalok ne'e halo lezada sofre moras iha nia hirus-matan.

Prokuradór akuza arguidu hanesan autor material ho forma konsumada ba krime violénsia doméstika ho forma ofensa ba integridade fízika simples, ne'ebé previstu tuir artigu 2 (2a), 3(a), 35(b) no 36 LKVD no artigu 145 KP.

Produsaun ba prova sira

Iha julgamentu, arguidu nega faktu hotu no deklara katak arguidu nunka haree lezada nia oin no konsidera lezada ko'alia arbiru.

Enkuantu lezada kontinua konfirma faktu sira hotu no deklara katak arguidu sofre moras mental no halo lezada tauk atu hasoru arguidu no moris la hakmatek. Lezada husu ba tribunál atu bele hatama arguidu ba iha fatin ruma hodi arguidu bele kalma.

Testemuña AE nu'udar arguidu nia feton depoimenta katak testemuña iha hela merkadu no hetan telefone hosi viziñu no haruka fila lalais tanba arguidu tebe lezada. Testemuña sente ladiak no ba kedas iha uma hodi hakalma lezada tanba arguidu moras. Testemuña hatutan katak durante ne'e sira halo hela tratamentu ba arguidu maibé arguidu mak nunka hemu aimoruk.

Alegasaun finál

Iha julgamentu, arguidu nega faktu hotu no lezada rasik deklara ba tribunál katak krime ne'e akontese duni maibé tanba arguidu sofre moras mental. Lezada mós deklara katak nia la sente seguru no husu atu tribunál bele tau arguidu iha fatin ruma hodi bele rekopera nia moras. Maibé prokuradór seidauk fiar bainhira laiha relatóriu médiku, tanba ne'e husu ba tribunál atu aplika pena prizaun tinan ida ba arguidu.

Enkuantu defeza solisita ba tribunál atu bele fó despaixu ida ba arguidu atu arguidu hetan relatóriu médiku, tanba iha julgamentu arguidu nia maneira sira ladun normal. Aleinde ne'e lezada rasik reforsa katak arguidu sofre moras mental. Tanba ne'e, husu ba tribunál atu bele fó pena ne'ebé mak justu no adekuada.

Desizaun

Depoisde avalia faktu sira ne'ebé produs iha julgamentu, tribunál sente estraiñu uitoan tanba lezada no testemuña deklara katak arguidu sofre moras mental, maibé iha julgamentu arguidu hatan ho diak bainhira tribunál husu kona-ba arguidu nia identifikasaun no arguidu koñese diak nia oan sira. Maibé kuandu tribunál husu kona-ba faktu sira arguidu hatan arbiru de'it.

Tribunál konsidera katak arguidu provadu komete krime hasoru lezada hanesan tebe lezada nia hirus-matan halo lezada monu ba rai. Maibé, tribunál mós deklara katak bainhira arguidu komete hahalok ne'e arguidu sofre hela kondisaun moras mentál bazeia ba lezada no testemuña nia deklarasaun.

Bazeia ba konsiderasaun hirak ne'e, tribunál kondena arguidu ba pena prizaun tinan ida iha prizaun. Maibé tribunál mós konsidera katak arguidu prezisa halo tratamentu no tenke hela iha fatin própriu hodi evita krime akontese tan, nune'e, decide atu haruka arguidu ba hela iha prizaun durante período tinan ida hodi hetan tratamentu ba arguidu nia saúde.

11. Krime ofensa ba integridade física simples natureza violência doméstica

Nú. Prosesu	: 0347/17.PDDIL
Kompozisaun Tribuná	: Singulár
Juis	: Dr. Ivan Patrosinio Gonsalves
Prokuradór	: Dr. Bartolomeu de Araújo
Defeza	: Dra. Marcia Sarmiento
Tipu pena	: Pena prizaun tinan 1 suspende ba tinan 1 fulan 6

Iha 12 Fevereiru 2019, Tribunál Distritál Dili prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu ALS hasoru nia feen, iha Distritu Dili.

Akuzasaun Prokuradór

Prokuradór akuza katak iha 02 Outubru 2017, lezada sona hela dose, arguidu hadeer mai ko'alia la para no tolok lezada no lezada hatan ba arguidu katak "*ó hein uitoan labele ka, dose tasak ona no hau lori ba agora*". La kleur deit, arguidu hakbesik-an ba lezada no tuku dala ida iha lezada nia oin, basa dalabarak iha hasan-loos no karuk to'o sura la bele no lezada nia oin halai. Arguidu mós lori kadeira masa ida baku dala ida iha lezada nia liman no dala ida iha kabun. Arguidu foti bloku tomak ida no tuda lezada maibé la kona tanba lezada hases tiha nia-an. Arguidu kontinua tuku dala ida iha lezada nia matan fukun halo lezada ba foti tudik iha dapur atu sona nia-aan tanba konsidera arguidu nia agresaun demais ona maibé arguidu halai ba hadau tiha tudik ne'e husi lezada nia liman.

Prokuradór konsidera arguidu halo hahalok sira ne'e ho livre, halo agresaun fízika no psíkika hasoru lezada hanesan arguidu nian kaben ne'ebé rezulta moras iha fatin atinjidu no halo lezada sente moe perante sira nia oan no viziñu sira.

Prokuradór akuza arguidu hanesan autor material ho forma konsumada ba krime violénsia doméstika ho forma ofensa ba integridade fízika simples, ne'ebé previstu iha artigu 2 (2a), 3(a), 35 (b) no 36 LKVD no artigu 145 KP.

Produsaun ba prova sira

Arguidu la notifikadu tanba serbisu ona iha Inglatera (arguidu edital). Enkuantu lezada kontinua konfirma faktu sira iha akuzasaun prokuradór no deklara katak problema akontese tanba deit lezada hadeer tarde hodi sona dose ba fa'an, nune'e halo arguidu preokupa tanba iha esperiensa antes kuandu sira ba fa'an tarde ema ladun sosa ona dose ne'e. Lezada kontinua hateten katak depoisde liutiha loron rua mak lezada ba hato'o keixa iha Xefe Suku Bidau no xefe suku rasik mak lori lezada ba keixa iha polísia. Lezada mós deklara katak maske arguidu iha ona Inglatera maibé fulan-fulan arguidu haruka osan US\$400.00 ba lezada hodi sustenta lezada no sira nia oan na'in lima.

Alegasaun final

Prokuradór argumenta katak mezmú arguidu atualmente la iha fatin no editál maibé iha faze investigasaun prokuradór nian, arguidu rekoñese katak nia baku

duni lezada tanba deit lezada hadeer tarde hodi sona dose. Iha parte seluk, lezada rasik konfirma ho akuzasaun. Prokuradór konsidera katak krime ne'e akontese duni no atu halo prevensaun iha futuru, husu ba tribunál atu aplika pena prizaun fulan neen suspende ba tinan ida.

Enkuantu defesa husu ba tribunál atu bele halo apresiasaun ba deklarasaun lezada nian no fó justisa ne'ebé justu ba arguidu.

Desizaun

Depoisde avalia faktu sira hotu, tribunál prova katak arguidu komete duni krime tuir faktu sira iha akuzasaun. Tanba ne'e, tribunál konklui no kondena arguidu ho pena prizaun tinan ida suspende ba tinan ida fulan neen sein arguidu ninia prezensa no kondena arguidu selu kustu judisiál US\$20.00.

12. Krime omisídiu simples tentadu

Nú. Prosesu : 0186/17PNSIC
Kompozisaun Tribunál : Koletivu
Juis : Dra. Maria Modesta, Dra. Edite Palmira no
Dr. Ivan Patricinio Antonio Goncalves
Prokuradór : Dr. Pedro Baptista
Defeza : Dr. Americo Martins (advogadu privadu)
Tipu pena : Pena prizaun tinan 5

Iha 12 Fevereiru 2019, Tribunál Distritál Dili prezide leitura akordaun ba krime omisídiu simples tentadu ne'ebé envolve arguidu Delio Freitas Barros hasoru lezada Julmira Lopes Ximenes, iha Distritu Dili.

Akuzasaun Prokuradór

Prokuradór akuza arguidu katak iha 15 Novembru 2017, iha tuku 15:10 lokraik, arguidu ba iha lezada nia uma iha Bidau Lesidere, arguidu husu tuir lezada katak "tanbasá ó lakohi tiha hau?". Lezada seidak hatan pergunta ne'e, arguidu ho tudik ida sona kedas ba lezada nia kabun maibé lezada satan tudik refere ho nia liman loos nune'e tudik sona kona iha lezada nia liman kabun no borus to'o iha lezada nia kabun. Aktu ne'e rezulta kanek boot iha lezada nia liman no kanek ki'ik iha lezada

nia kabun parte loos. Depoisode akontesementu ne'e, lezada halo tratamentu iha ospital durante loron neen tanba lezada hetan opera iha liman.

Prokurador akuza arguidu kontra artigu 138 KP kona-ba omisidui simples ho moldura penal tinan 8 to'o 20 prizaun, konjuga ho artigu 23 KP kona-ba tentativa.

Produsaun ba prova sira

Iha prosesu julgamentu, arguidu nega hotu faktu sira iha akuzasaun prokurador nian no deklarata katak nia la hatene akontesimentu ne'e no la'os nia mak sona lezada. Arguidu mos jura ho Maromak nia naran katak nia la halo hahalok ne'e hasoru lezada.

Entretantu lezada kontinua konfirma hotu faktu iha akuzasaun no deklarata katak arguidu mak sona nia maske arguidu uza kapasete no taka nia ibun ho *masker*. Aleinde ne'e tuir lezada, iha momentu ne'ebá arguidu uza kamiza liman badak no kalsa levis kor metan.

Hafoin akontesimentu ne'e, lezada hakilar dehan ema sona nia no nia subriña naran Liola Nunes Ximenes halai ba no haree lezada hetan sona ona. Lezada husu atu nia subriña ne'e telefone kedas ba lezada nia maun (Basilio Ximenes). Liu tiha minutu balun, Basilio to'o iha fatin akontesimentu no lori lezada ba halo tratamnetu iha ospital. Basilio mak telefone ba polisia kona-ba akontesimentu ne'e.

Lezada hatutan katak nia koñese momos arguidu nia lian bainhira arguidu bolu lezada tanba sira iha relasaun namora durante tinan 4 (2013-2017). Iha momentu sira namora ne'e, arguidu no lezada halo juramentu hemu ran hodi mantein sira nia relasaun to'o hola malu, maibe tanba arguidu iha namora seluk, sempre baku lezada, no ameasa lezada dala tolu katak "*ó lakohi ha'u, ha'u sei oho mate ó*" nune'e, lezada deside lakohi ona arguidu. Lezada mos deklarata katak nia laiha problema ho ema seluk so iha deit problema ho arguidu.

Testemuña Liola Nunes Ximenes nu'udar lezada nia subriña depoimenta katak nia la haree ho matan arguidu sona lezada maibe bainhira rona lezada hakilar katak ema sona, testemuña halai tama ba uma laran no haree lezada hetan sona ona. Bainhira haree lezada nia kondisaun, testemuña sente tauk no la konsege haree ema

ne'ebé sona lezada. Hafoin iha minutu balun lezada hateten ba testemuña atu telefone ba lezada nia maun, Basilio.

Testemuña Basilio Ximenes nu'udar lezada nia maun depoimenta katak nia hetan kontaktu hosi Liola kona-ba akontesimentu ne'e no testemuña ba kedas iha fatin akontesimentu no lori kedas lezada ba iha ospital. Tuir dalan ba ospital, lezada temi katak arguidu Delio mak sona nia, nune'e testemuña kontaktu kedas ba polisia.

Testemuña Mateus Boavida nu'udar arguidu nia primu depoimenta katak depoisde akontesimentu, arguidu husu ajuda ba testemuña atu hamutuk ho arguidu ba haree lezada iha lezada nia uma maibe bainhira to'o iha ne'eba sira la konsege haree lezada tanba lezada nia maun duni arguidu no nia primu.

Alegsaun final

Prokurador konsidera katak arguidu komete duni krime ne'e hasoru lezada bazeia ba lezada nia deklarasaun. Tuir prokurador katak lezada koñese arguidu tanba sira iha relasaun nu'udar namora tinan haat ona no laiha problema ho ema seluk. Prokurador hatutan katak iha momentu ne'eba arguidu uza kapasete no masker ho objetivu atu ema seluk la bele koñese arguidu bainhira nia halo krime ne'e. Tanba ne'e, husu ba tribunál atu aplika pena prizaun tinan tolu fulan neen.

Entertantu defeza husu tribunál absolve arguidu hosi krime ne'e, tanba dúvida ho deklarasaun arguidu no lezada nian ne'ebé kontráriu ba malu. Aleinde ne'e, testemuña sira mós la haree ho matan akontesimentu ne'e.

Tanba dúvida ne'e, tribunál halo akareasaun ba arguidu no lezada. Iha akreasaun ne'e, arguidu ho lezada idak-idak mantein sira nia deklarasaun ho nune'e prokurador no defeza mós mantein sira nia alegasaun.

Desizaun

Depoisde avalia faktu sira hotu, tribunál konsidera liu ba iha lezada nia deklarasaun no prova katak antes akontesimentu arguidu ameasa ona atu oho lezada, lezada la iha inimigu ho ema seluk. Tribunál prova katak lezada koñese diak arguidu tanba sira iha relasaun namora durante tinan haat no bainhira iha ospital lezada temi katak arguidu mak sona lezada. Rezultadu inspesaun ba fatin krime nian hatudu katak distánsia entre lezada ho ema ne'ebé sona lezada iha

metru rua. Nune'e tribunál intende katak tuir loloos diresaun tudik ba iha lezada nia kabun maibé tanba lezada satan ho liman nune'e tudik refere kona uluk iha liman mak ba kona iha kabun, se lezada la satan ho liman bele rezulta lezada mate.

Bazeia ba konsiderasaun hirak ne'e tribunál prova katak arguidu ninia hahalok prenxe duni krime omisídiu simples ho forma tentada. Tribunál mós halo alterasaun ba kualifikasaun juridika hodi aumenta tan artigu 2 (nú. 1 let. b) no artigu 20 (nu. 1) hosi Lei Nú. 5/ 2017 kona-ba krime arma brankas tanba konsidera tudik ne'ebé arguidu uza ho nia naruk sentimetru 14 iha parte kroat, luan sentimetru rua, no tomak sentimetru 25. Hafoin, tribunál konklui prosesu ne'e no kondena arguidu ho pena prizaun tinan lima.

13. Krime ofensa ba integridade fízika simples ho natureza violénsia doméstika

Nú. Prosesu : 0183/18.DIBCR
Kompozisaun Tribunál : Singulár
Juis : Dra. Albertina da Conceição das Neves
Prokuradór : Dr. Bartolomeu de Araújo
Defeza : Dr. Germano Guterres Ramos (defensór estajiáriu)
Tipu pena : Pena prizaun fulan 3 suspende ba tinan 1

Iha 18 Fevereiru 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu EdCP hasoru nia feen, iha Distritu Dili.

Akuzasaun Prokuradór

Prokuradór akuza katak iha 02 Agostu 2018, tuku 09:00 dadeer, arguidu halimar hela nia facebook iha ninia telefone no lezada husu arguidu ninia telefone atu haree mós nia facebook. Arguidu fó nia telefone ne'e ba lezada maibé lezada la bele asesu facebook tanba arguidu nia telefone uza *password* nune'e, lezada tuda rahun tiha arguidu ninia telefone ho marka *samsung*.

Iha 03 Agostu 2018, tuku 09:00 dadeer, arguidu haruka lezada atu troka fila fali nia telefone ne'ebé lezada tuda rahun tiha ne'e maibé lezada lakohi. Arguidu hirus no tuku dala rua iha lezada nia kanuruk, buti lezada niaibun halo lezada monu ba rai.

Arguidu nia feton (LdC) mak ajuda lezada hamrik no buti lezada nia ain. Arguidu mós dehan “hau baku ó, depois ó ba bolu ó-nia inan polísia ne’e.”

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to’o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba faktu iha akuzasaun katak la tuku dala rua iha lezada nia ulun maibé arguidu kumu liman no dudu deit ba iha lezada nia ulun. Arguidu mós la buti lezada niaibun. Arguidu deklara katak iha iha momentu ne’ebá lezada foin partu halo fulan rua ho nune’e halo lezada oin nakukun no monu mesak ba rai. Entretantu kona-ba liafuan ne’ebé haruka lezada ba bolu nia inan polísia, arguidu rekoñese katak nia ko’alia duni. Arguidu deklara katak arrepende ninia hahalok, foin primeiravés hatan iha tribunál no depoisde akontesimentu ne’e arguidu ho lezada separa ona nu’udar feen-laen to’o agora.

Iha parte seluk lezada kontinua konfirma faktu hotu iha akuzasaun no deklara katak iha momentu ne’ebá arguidu ejize lezada atu selu fila fali nia telefone halo lezada hirus no lezada lori kadiadu odamatan tuda arguidu maibé la kona, nune’e arguidu fila no tuku dala rua iha lezada nia kanuruk no butiibun. Tanba trauma no tauk ho hahalok arguidu nian ne’e, lezada halai no monu. Lezada mós deklara katak iha momentu ne’ebá nia sente ulun moras no oin nakukun tanba nia foin mak partu fulan rua. Arguidu nia feton (LdC) mak ajuda lezada hamrik no lori ba tur iha kadeira hodi buti lezada nia ain.

Testemuña LdC nu’udar arguidu ninia feton deklara katak nia la hatene kona-ba tuda telefone maibé iha 03 Agostu 2018, tuku 09:00 dadeer, nia iha kuartu sorin rona ema baku malu no haree lezada monu ba rai. Entretantu kona-ba buti lezada nia ain, testemuña rekuza.

Tanba deklarasaun entre lezada ho testemuña la hanesan nune’e tribunál halo akareasaun entre lezada ho testemuña ba faktu buti lezada ninia ain. Hosi rezultau akareasaun ne’e testemuña depoimenta katak nia buti duni lezada ninia ain bainhira lezada dehan ninia oin nakukun.

Alegasaun finál

Prokuradór konsidera arguidu provadu komete krime hasoru lezada mezmú arguidu nega faktu ne'ebé prokuradór akuza ba nia, maibé lezada kontinua konfirma hotu faktu sira iha akuzasaun. Aleinde ne'e, prokuradór argumenta katak testemuña (LdC) koko atu subar faktu balu katak la kumu lezada ninia ain, maibé bainhira tribunál halo akareasaun entre testemuña no lezada, testemuña rekoñese katak nia buti duni lezada nia ain. Tanba ne'e, husu ba tribunál atu aplika pena prizaun suspende ninia ezekusaun mezmú arguidu ho lezada hela ketak-ketak ona maibé arguidu iha posibilidade repete ninia hahalok tanba sira iha oan ne'ebé ejize arguidu ninia responsablidade atu tau matan.

Iha parte seluk, defeza husu ba tribunál atu tetu sirkunstánsia atenuante sira hanesan arguidu arrepende ninia hahalok, foin primeraves hatan iha tribunál, diak malu ona mezmú sira la moris hamutuk ona nu'udar feen-laen. Mesmu nune'e arguidu sei iha responsabilidade ba sira nia oan ne'ebé mak hela hamutuk ho lezada iha lezada nia inan-aman. Bazeia ba konsiderasaun hirak-ne'e, husu ba tribunál atu kondena pena adekuadu ba arguidu.

Desizaun

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu, arrepende ona ninia hahalok, foin primeiravés hatan iha tribunál no iha responsabilidade ba nia sira nia-oan, tribunál kondena arguidu ho pena prizaun fulan neen suspende ba tinan ida.

14. Krime ofensa ba integridade fízika simples ho natureza violénsia doméstika

Nú. Prosesu	: 0156/17.DIDIL
Kompozisaun Tribunál	: Singulár
Juis	: Dra. Edite P. Reis
Prokuradór	: Dr. Reinato Bere Nahac
Defeza	: Dr. Hendrique João Mariz (defensór estajiáriu)
Tipu pena	: Pena prizaun tinan 1 fulan 6 suspende ba tinan 3

Iha 19 Feveireiru 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AS hasoru nia feen, iha Distritu Dili.

Akuzasaun Prokuradór

Prokuradór akuza katak iha 02 Setembru 2018, tuku 15:00 lokraik, arguidu ho lezada diskute malu kona-ba lezada la hatan sira nia oan atu ba haris iha tasi, tanba sira nia oan moras. Nune'e arguidu basa dala rua iha lezada nia kanuruk no lori liman sikun fai dala haat iha lezada nia kabaas sorin karuk no rezulta lezada oin nakukun no desmaia to'o monu ba rai. Depois agresaun ne'e arguidu ho motor halai ses tiha hosi fatin akontesimentu. Aktu ne'e rezulta lezada sente moras iha nia kanuruk, moras no metan iha nia kabaas parte karuk no ba halo tratamentu iha Sentru Saude Vera-Cruz.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu balun no nega faktu balun. Arguidu deklara katak nia simu telefone husi lezada bainhira nia iha hela servisu fatin. Lezada haruka arguidu fila ba uma hodi lori sira nia oan ba haris iha tasi. Bainhira arguidu to'o iha uma no atu lori sira nia oan ba haris iha tasi, lezada la hatan maske sira nia oan tanis hakarak ba haris duni iha tasi. Arguidu nega katak la basa no la lori liman sikun fai iha lezada nia kanuruk halo lezada desmaia no monu ba rai. Arguidu deklara katak lezada monu ba rai tanba deit arguidu rasta lezada atu lezada husik sira nia oan. Arguidu rekoñese katak bainhira lezada monu ba rai, arguidu foti motor fila fali ba serbisu fatin no fila ba uma iha dadersan. Arguidu hatutan katak problema ne'e, liu tiha semana rua mak sira rezolve no arguidu fó sala ba família lezada nian osan US\$500.00. Antes ne'e arguidu hetan ona desizaun pena multa ho US\$95.00 ba krime hanesan hasoru lezada.

Iha parte seluk, lezada konfirma hotu faktu sira iha akuzasaun no deklara katak nia desmaia tanba trauma ho arguidu ninia hahalok. Lezada mós dehan katak antes ne'e nia kontaktu arguidu atu lori sira nia oan ba haris tasi maibé arguidu mai kleur liu

no bainhira arguidu mai sira nia oan isin-manas ona nune'e lezada la hatan ona atu ba tasi. Lezada deklara katak problema ne'e liu loron rua mak lezada foin ba halo tratamentu iha Sentru Saude Vera-Cruz. Lezada mós konfirma ho arguidu nia deklarasaun katak sira rezolve ona problema ne'e tuir kustume Timor nian no lezada perdua ona ba arguidu.

Alegasaun final

Prokuradór konsidera arguidu provadu komete krime hasoru lezada tanba lezada konfirma hotu faktu iha akuzasaun. Nune'e maske arguidu konfesa parsialmente maibé konsidera sirkunstánsia sira hanesan arguidu hetan ona kondenasau ba krime antes, husu ba tribunál atu kondena arguidu ho pena prizaun tinan ida fulan lima suspende ba tinan rua.

Entretantu, defeza husu ba tribunál atu tetu sirkunstánsia atenuante sira hanesan arguidu arrepende ninia hahalok, rezolve ona problema ne'e tuir kustume Timor nian, sira diak malu ona no promete ba tribunál atu la repete tan hahalok hanesan hasoru lezada. Tanba ne'e husu ba tribunál atu kondena arguidu ho pena ne'ebé justu no adekua.

Desizaun

Depoizde avalia faktu hotu, tribunál prova katak arguidu komete duni krime tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun tinan ida fulan neen suspende ba tinan tolu.

15. Krime ofensa ba integridade física simples ho natureza violénsia doméstika

Nú. Prosesu	: 0035/18.PDDIL
Kompozisaun Tribunál	: Singulár
Juis	: Dr. Eusébio Xavier Victor
Prokuradór	: Dr. Nelson de Carvalho
Defeza	: Dr. José da Silva
Tipu pena	: Pena prizaun tinan 1 suspende ba tinan 1 fulan 6

Iha 25 Feveireiru 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CS hasoru nia feen, iha Distritu Likisá.

Akuzasaun Prokuradór

Prokuradór akuza katak iha 20 Agostu 2017, tuku 10:00 dadeer, lezada ho nia oan sira foin tun husi bis atu han katupa iha Loes, arguidu tun husi motorizada ba tan lezada ho ninia oan sira no tuku kedas dala ida iha lezada nia kabun sorin-loos halo lezada monu kedas ba rai. Arguidu kontinua tuku, tebe no sama lezada nia kotuk-laran halo lezada desmaia.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu balu no nega faktu balu katak tuku duni dala ida iha lezada nia kabun sorin-loos maibé lezada la monu ba rai. Arguidu rekoñese katak nia tuku, tebe no sama lezada nia kotuk maibé lezada la desmaia. Arguidu deklara katak nia halo agresaun ne'e tanba lezada sai husi uma ho sira nia oan atu ba Distritu Maliana maibé la fó koñesementu ba arguidu. Arguidu mós deklara katak sira la moris hamutuk ona hanesan feen ho laen no sira nia oan na'in tolu hela ho arguidu no oan na'in rua hela ho lezada.

Iha parte seluk lezada konfirma faktu hotu iha akuzasaun no deklara katak arguidu iha momentu ne'ebá depoisde komete aktu hirak ne'e, arguidu halai kedas hosi fatin tanba tauk ema sira iha ne'ebá.

Alegasaun final

Prokuradór haktuir katak arguidu maske arguidu nega faktu balun maibé lezada konfirma faktu sira iha akuzasaun no ida ne'e signifika katak arguidu komete duni krime hasoru lezada. Tanba ne'e atu evita krime ne'e akontese tan iha futuro, husu ba tribunál atu kondena arguidu ho pena prizaun fulan neen suspende ba tinan ida.

Aleinde ne'e defeza haktuir katak arguidu konfesa faktu balu hosi akuzasaun. Arguidu no lezada forma família kleur ona no foin iha problema tanba deit lezada

lori labarik sira ba Maliana la iha koñesementu hosi arguidu. Aleinde ne'e sira la moris hamutuk ona, arguidu foin primeiravés komete krime hasoru lezada no arguidu arrepende ona nia hahalok. Tanba ne'e, husu ba tribunál atu fó justisa ba arguidu.

Desizaun

Depoisde avalia faktu hotu, tribunál prova katak arguida komete duni krime tuir faktu sira iha akuzasaun. Bazeia ba faktu provadu sira ne'e no sirkunstánsia atenuante sira hanesan arguidu arrepende ninia hahalok, foin primeiravés hatan iha tribunál no arguidu mak tau-matan ba ninia oan nain lima, tribunál kondena arguidu ho pena prizaun tinan ida suspende ba tinan ida fulan neen.

16. Krime ofensa ba integridade fízika simples ho natureza violénsia doméstika

Nú. Prosesu : 0104/18 PCCIC
Kompozisaun Tribunál : Singulár
Juis : Dra. Zulmira Auxiliadora Barros da Silva
Prokuradór : Dr. Bartolomeu de Araújo
Defeza : Dra. Laura Lay
Tipu pena : Pena prizaun tinan 2 fulan 3 suspende ba tinan 3 ho
regra ba
kondukta

Iha 27 Feveireiru 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu BM hasoru nia feen, iha Distritu Dili.

Akuzasaun Prokuradór

Prokuradór akuza katak Iha 22 Agostu 2018, tuku 12:00 meudia, laho konesimentu hosi arguidu, lezada ho ninia kolega sira ba paseiu iha Praia Tibalau, Maubara. Bainhira arguidu telefone mak lezada foin informa ba arguidu. Depoisde halo kontaktu, arguidu ho motorizada ba kedas lezada nia fatin no bainhira to'o arguidu telefone ba lezada atu hasoru arguidu iha estrada. Lezada sae ba hasoru arguidu no arguidu trata-at lezada ho liafuan tolok no tebe dala ida iha lezada nia ain sorin-loos no dala ida iha karuk rezulta lezada monu ba rai. Arguidu husu lezada entrega

ninia telefone maibé lezada la entrega, nune'e arguidu rasta lezada ninia faru no pasta no tuku tan dala rua iha lezada ninia kotuk. Lezada sente tauk no halai ses ba tur tiha iha hadak leten ida. Arguidu tuir ba buti lezada nia kakorok halo lezada dada-iis la diak. Depoisde ne'e, arguidu fila fali mai Dili husik hela lezada iha fatin akontesimentu. Lezada fila hosi Maubara kalan no ba toba iha nia servisu fatin (*salon*) no iha dadersan mak lezada ba tratamentu nia saude iha sentru saude no ba keixa iha polisia.

Aleinde ne'e maisumenus iha fulan ida antes, arguidu basa dala rua iha lezada ninia hasan tanba arguidu deskonfia lezada iha relasaun amante ho mane seluk.

Prokurador akuza arguidu kontra artigu 145 KP kona-ba krime ofensa ba integridade fizika simples ho nia moldura penal to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa hotu faktu iha akuzasaun no deklarata katak arrepende ba ninia hahalok. Arguidu mos deklarata katak liu loron ida sira diak malu no kontinua moris hamutuk hanesan feen-laen. Arguidu mos deklarata katak to'o agora la baku ona lezada.

Aleinde ne'e, lezada konfirma faktu sira iha akuzasaun no deklarata katak bainhira nia fila husi eskuadra polisia Komoro mak arguidu haruka lezada fila ba uma. Lezada deklarata katak durante sira moris hamutuk nu'udar feen-laen, arguidu sempre baku hela deit lezada kuandu lezada halo sala ruma, maibe lezada la hato'o keixa. Lezada konfirma arguidu nia deklarasaun katak, hafoin de keixa, arguidu la baku ona lezada to'o agora.

Alegasaun final

Prokurador konsidera arguidu provadu komete krime hasoru lezada bazeia ba arguidu nia deklarasaun no depoimentu konfirmasaun hosi lezada no relatoriu mediku. Prokurador argumenta katak haree ba krime violensia domestikaaas tebetes tanba kuaze lor-loron julga iha tribunál sira, nune'e atu halo prevensaun iha futuro, atu arguidu la bele repete ninia hahalok hasoru lezada, husu ba tribunál atu kondena arguidu ho pena prizaun suspende ninia ezekusaun.

Aleinde ne'e defeza husu ba tribunál atu kondena arguidu ho pena ne'ebé mais adekuaudu tanba arguidu konfesa faktu hotu iha akuzasun, arguidu arrepende ninia hahalok no diak malu ona ho lezada.

Desizaun

Depoisde avalia faktu hotu, tribunál prova katak arguidu komete duni krime ofensa ba integridade fízika simples dala rua tuir faktu sira iha akuzasaun. Bazeia ba faktu provadu sira ne'e, tribunál konklui prosesu ne'e no kondena arguidu ba krime primeiru ne'ebé akontese tinan ida antes ona, ho pena prizaun fulan neen. Enkuantu ba krime segundu, ne'ebé akontese iha praira Tibalau Maubara, tribunál kondena ho pena prizaun tinan ida fulan sia.

Hosi pena rua ne'e, tribunál halo akumulasaun ba pena úniku tinan rua fulan tolu suspende ba tinan tolu. Aleinde ne'e, tribunál mós aplika regra ba konduta atu arguidu apresenta-an kada fulan ida dala ida durante tinan ida iha tribunál.

17. Krime ofensa ba integridade fízika simples natureza violénsia doméstika

Nú. Prosesu : 0034/18.DIBCR
Kompozisaun Tribunál : Singulár
Juis : Dra. Maria Modesta
Prokuradór : Dr. Bartolomeu de Araújo
Defeza : Dr. Sergio Quintas
Tipu pena : Pena prizaun fulan 3 suspende ba tinan 1.

Iha 28 Feveireiru 2019, Tribunál Distritál Dili prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DS hasoru nia feen, iha Distritu Dili.

Akuzasaun Prokuradór

Prokuradór akuza katak iha 06 Feveireiru 2018, oras 06:00 dadeer, arguidu hadeer mai no lori ai-fau sanak maran ida baku dala ida iha lezada nia ulun no rezulta kanek no raan-fakar. Lezada halo tratamentu iha klínika Hera no suku pontu tolu. Antes kazu ne'e akontese, lezada buka nia alin nia osan US\$80.00 iha kofre ida no rai iha sira nia kuartu-laran. Bainhira lezada haree ba kofre ne'e, hela deit osan

rahan hamutuk US\$10.00 maibé osan tahan laiha hotu. Tanba ne'e, lezada husu ba arguidu maibé arguidu hirus no halo agresaun hasoru lezada. Aktu hirak ne'e rezulta lezada sofre moras iha ulun no kanek nomos raan-fakar.

Prokuradór akuza arguidu hanesan autor material ho forma konsumada ba krime violénsia doméstika ho forma ofensa ba integridade fízika simples, ne'ebé previstu tuir artigu 2 (2a), 3(a), 35 (b) no 36 LKVD no artigu 145 KP.

Produsaun ba prova sira

Iha julgamentu, arguidu konfesa ninia hahalok no deklara katak lezada ko'alia lian maka'as halo arguidu sente la diak ho viziñu sira ne'ebé sei toba hela, tanba lezada ko'alia kona-ba osan ne'e iha tuku 04:00 madrugada la'os tuku 06:00 hanesan iha akuzasaun. Arguidu hatutan katak nia la foti osan refere tanba xave armáriu nian ne'ebé kofre ne'e tau ba, tara deit iha lezada nia kakorok. Nune'e arguidu lamenta tanbasá mak osan lakon, no lezada tenke husu fali ba arguidu ho nia oan sira.

Enkuantu lezada kontinua konfirma faktu hotu no deklara katak depoisde fila hosi tratamentu, lezada ba hato'o kedas keixa iha polísia no polísia ba detein kedas arguidu iha sela durante oras 72 no lezada moras durante loron haat.

Alegasaun final

Prokuradór konsidera krime ne'e akontese duni tanba arguidu konfesa faktu sira hotu. Arguidu só rekuza deit mak kona-ba oras akontesementu iha tuku 04:00 madrugada la'os tuku 06:00 hanesan iha akuzasaun. Tanba ne'e, husu ba tribunál atu aplika pena minimum husi pena ne'ebé mak iha maibé suspende ba pena minimum.

Enkuantu defesa husu ba tribunál atu kondena arguidu ho pena ne'ebé adekuadu ba arguidu tanba arguidu konfesa ninia hahalok no arguidu foin primeiravés komete hahalok ne'e hasoru lezada.

Desizaun

Tribunál konklui katak arguidu provadu duni komete krime hasoru lezada hanesan haktuir iha akuzasaun. Bazeia ba prova sira ne'e, tribunál kondena arguidu ho pena prizaun fulan tolu suspende ba tinan ida.

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.tl

info@jsmp.tl

Telefone: 3323883